







重刊華陽國志叙

宋卅稜李丞叔塵撰



古者封建五等諸侯國皆有史以記事後世罷封建為郡縣然亦必有圖志以具述蓋以疆域既殊風俗各異山川有險要阨塞之當備郡邑有廢置割隸之不常至於一士之行一民之謠皆有不可殫者願非筆之於書則不能也周官職方掌天下之地圖辨其邦國都鄙夷蠻閩貉五戎六狄之人民與其財用之數至於九穀之所宜六畜之所產亦未嘗不佔畢而紀其詳况夫環數千里之地分城置邑殆踰數十中



間時異事變往往裂為偏方霸國其理亂得失蓋有  
繫天下大數安可使放絕而無聞乎此晉常璩華陽  
國志之作所以有補於史家者流也予嘗攷其書部  
分區別各有條理其指歸有三焉首述巴蜀漢中南  
中之風土次列公孫述劉二牧蜀二主之興廢及晉  
太康之混一以迄於特雄壽勢之僭竊繼之以兩漢  
以來先後賢人梁益寧三州士女摠讚序志終焉就  
其三者之間於一方人物尤致深意雖侏離之氓賤  
俚之婦苟有可取在所不棄此尤足以弘宣風教使  
善惡知所懲勸豈但屑屑於山川物產以資廣見異

聞而已乎本朝元豐間呂汲公守成都嘗刊是書以  
廣其傳而載襍荒忽刊缺愈多觀者莫曉予每患此  
久矣假守臨邛官居有暇蓋嘗博訪善本以證其誤  
而莫之或得因撫兩漢史陳壽蜀書益部耆舊傳互  
相參訂以決所疑凡一事而先後失序本末舛逆者  
則考而正之一意而詞旨重複句讀錯雜者則刊而  
去之設或字誤而文理明白者則因而全之其它旁  
搜遠取求通于義者又非一端凡此皆有明驗可信  
不誣者若其無所考據則亦不敢臆決姑闕之以俟  
能者然較以舊本之訛謬大略十得五六矣鋟木既



具輒叙所以冠於篇首好古博雅與我同志者願無  
以夏五郭公之義而律之嘉泰甲子季夏朔日序

華陽國志序

呂大防微仲譔

先王之制自二十五家之間書其恭敏任恤等而上  
之或月書其學行或歲考其道德故民之賢能表惡  
其吏無不與知之者焉漢魏以還井地廢而王政缺  
然猶時有所考察旌勸而州都中正之職尚修於群  
國鄉間士女之行多見於史官隋唐急事緩政此制  
遂廢而不舉潛德隱行非野史紀述則悉無見於時  
民日益漓俗日益卑此有志之士所為歎惜也晉常  
璩作華陽國志於一方人物丁寧反覆如恐有遺雖



蠻髦之民井臼之婦苟有可紀皆著於書且云得之陳壽所為者舊傳按壽嘗為郡中正故能著述若此之詳自先漢至晉初踰四百歲士女可書者四百人亦可謂衆矣復自晉初至于周顯德僅七百歲而使所紀者無幾人忠冤義骨與塵埃野馬同沒於丘原者蓋亦多矣豈不重可歎惜哉此書雖繁富不及承祚之精微然議論忠薦樂道人之善蜀記之可觀未有過於此者鏤行諸世庶有益於風教云宋元豐戊申秋日序

華陽國志目錄



第一 巴志

第二 漢中志

第三 蜀志

第四 南中志

第五 公孫述劉二牧志

第六 劉先主志

第七 劉後主志

第八 大同志

第九 李特雄壽勢志



第十 先賢士女摠讚

第十一 後賢志

第十二 序志并益梁寧三州先漢以來士女目錄

校刻華陽國志凡例

一志字脫悞據史傳證易餘仍闕疑統貽強聞之士

一先賢志遺第二卷巴郡士女計七十八人傳讚故舊逸也宋李叔厘校刻曾未指出今考明闕之庶備摻補

一後賢志以讚冠篇首始次第列傳今取先賢士女志准其例成一家體

一志傳中文較史傳多省竄至不可解或地理名與史傳異者各註引明之



華陽國志卷第一  
一三州士女目錄人多遺逸本列傳中表出  
一考常氏士女共得十九人璩書未盡及之特錄  
出附在卷末

華陽國志卷第一

巴志

昔在唐堯洪水滔天鯀功無成聖禹嗣興導江疏河  
百川蠲脩封殖天下因古九囿以置九州仰稟參伐  
俯壤華陽黑水江漢為梁州厥土青黎厥田惟下上  
厥賦惟下中厥貢璆鐵銀鏤砮磬熊羆狐狸織皮於  
是四奧既宅九州迺同六府孔脩庶土交正底睿財  
賦成貢中國蓋時雍之化東被西漸矣歷夏殷周九  
州牧伯率職周文為伯西有九國及武王克商并徐  
合青省梁合雍而職方氏猶掌其地辨其土壤甄其



寶利起于秦帝漢興高祖藉之成業乃改雍曰涼革  
梁曰益故巴漢庸蜀屬益州至魏咸熙元年平蜀始  
分益州巴漢七郡置梁州治漢中以相國參軍中山  
耿輔為刺史

元康六年廣漢益州更割雍州之武都陰平荊州之  
新城上庸魏興以屬焉凡統郡一十一縣五十八洛  
書曰人皇始出繼地皇之後兄弟九人分理九州為  
九囿人皇居中州制八輔華陽之壤梁岷之域是其  
一囿囿中之國則巴蜀矣其分野輿鬼東井其君上  
世未聞五帝以來黃帝高陽之支庶世為侯伯及禹

治水命州巴蜀以屬梁州禹娶於塗山辛壬癸甲而  
去生子啓呱呱啼不及視三過其門而不入室務在  
救時今江州塗山是也帝禹之廟銘存焉會諸侯於  
會稽執玉帛者萬國巴蜀往焉周武王伐紂實得巴  
蜀之師著乎尚書巴師勇銳歌舞以凌殷人倒戈故  
世稱之曰武王伐紂前歌後舞也武王既克殷以其  
宗姬於巴爵之以子古者遠國雖大爵不過子故吳  
楚及巴皆曰子 其地東至魚復西至棘道北接漢  
中南極黔涪土植五穀牲具六畜桑蠶麻紵魚鹽銅  
鐵丹漆茶蜜靈龜巨犀山鷄白雉黃潤鮮粉皆納貢



之其果實之珍者樹有荔支蔓有辛薊園有芳蒟香  
茗給客橙葵其藥物之異者有巴戟天椒竹木之  
瓚者有桃支靈壽其名山有塗籍靈臺石書邗山  
其民質直好義土風敦厚有先民之流故其詩曰川  
崖惟平其稼多黍旨酒嘉穀可以養父野惟阜丘彼  
稷多有嘉穀旨酒可以養母其祭祀之詩曰惟月孟  
春獺祭彼崖永言孝思享祀孔嘉彼黍既潔彼儀惟  
澤蒸命良辰祖考來格其好古樂道之詩曰日月明  
明亦惟其名誰能長生不朽難獲又曰惟德實寶富  
貴何常我思古人令問令望而其失在於重遲魯鈍

俗素樸無造次辨麗之氣其屬有濮寶苴共奴獯夷  
延之蠻周之仲世雖奉王職與秦楚鄧為比春秋魯  
桓公九年巴子使韓服告楚請與鄧為好楚子使道  
朔將巴客聘鄧鄧南鄙攻而奪其幣巴子怒伐鄧敗  
之其後巴師楚師伐申楚子驚巴師魯莊公十八  
年巴伐楚克之魯文公十六年巴與秦楚共滅庸  
哀公十八年巴人伐楚敗於鄢是後楚主夏盟秦  
擅西土巴國分遠故於盟會希與戰國時嘗與楚婚  
及七國稱王巴亦稱王周之季世巴國有亂將軍  
蔓子請師於楚許以三城楚王救巴巴國既寧楚使



請城蔓子曰藉楚之靈克弭禍難誠許楚王城將吾頭往謝之城不可得也乃自刎以頭授楚使王歎曰使吾得臣若巴蔓子用城何為乃以上卿禮葬其頭巴國葬其身亦以上卿禮周顯王時楚國衰弱秦惠文王與巴蜀為好蜀王弟苴私親於巴巴蜀世戰爭周慎王五年蜀王伐苴侯苴侯奔巴巴為求救於秦秦惠文王遣張儀司馬錯救苴巴遂伐蜀滅之儀貪巴苴之富因取巴執王以歸置巴蜀及漢中郡分其地為一縣儀城江州司馬錯自巴涪水取楚商於之地為黔中郡秦昭襄王時白虎為害自秦蜀

巴漢患之秦王乃重募國中有能煞虎者邑萬家金帛稱之於是夷胸忍康仲藥何射虎秦精等乃作白竹弩於高樓上射虎中頭三節白虎常從羣虎瞋恚盡搏煞羣虎大吻而死秦王嘉之曰虎歷四郡害千二百人一朝患除功莫大焉欲如要王嫌其夷人乃刻石為盟要復夷人頃田不租十妻不筭傷人者論煞人顧死倭錢倭蠻夷贖罪貨盟曰秦犯夷輸黃龍一雙夷犯秦輸清酒一鍾夷人安之漢興亦從高祖定秦有功高祖因復之專以射白虎為事戶歲出寶錢口四十故世號白虎復夷一曰板楯蠻今所謂弜頭虎子



者也 漢高帝滅秦為漢王王巴蜀閬中人范目有  
恩信方略知帝必定天下說帝為募發實民要與共  
定秦秦地既定封目為長安建章卿侯帝將討關東  
實民皆思歸帝嘉其功而難傷其意遂聽還巴謂目  
曰富貴不歸故鄉如衣繡夜行耳徙封閬中慈鄉侯  
目固辭乃封渡沔縣侯故世謂三秦亡范三侯也目  
復除民羅朴督鄂度夕龔七姓不供租賦 閬中有  
渝水實民多居水左右天性勁勇初為漢前鋒陷陣  
銳氣喜舞帝善之曰此武王伐紂之歌也乃令樂人  
習學之今所謂巴渝舞也天下既定高帝乃分巴置

廣漢郡 孝武帝又兩割置犍為郡故世曰分巴割  
蜀以成犍廣也 自時厥後五教雍和秀茂挺逸英  
偉既多而風謠旁作故朝廷有忠貞盡節之臣鄉黨  
有主文歌詠之音巴郡譙君黃仕成哀之世為諫議  
大夫數進忠言後違避王莽又不事公孫述述怒遣  
使齎藥酒以懼之君黃笑曰吾不省藥乎其子瑛納  
錢八百萬得免國人作詩曰肅肅清節士執德寔固  
貞違惡以授命沒世遺令聲

巴郡陳紀山為漢司隸校尉嚴明正直西虜獻眩王  
庭試之分公卿以為嬉紀山獨不視京師稱之巴人



歌曰築室載直梁國人以貞真邪娛不揚目枉行不  
動身奸軌僻乎遠理義協乎民

巴郡嚴王思為揚州刺史惠愛在民每當遷官吏民  
塞路攀轅詔遂留之居官十八年卒百姓若喪考妣  
義送者齎錢百萬欲以贍王思家其子徐州刺史不  
受送吏義崇不忍持還乃散以為食食行客巴郡太  
守汝南應季先善而美之乃作詩曰乘彼西漢潭潭  
其淵君子愷悌作民二親沒世遺愛式鏡後人 漢  
安帝時巴郡太守連失道國人風之曰明明上天下  
土是觀帝選元后求定民安孰可不念禍福由人願

君奉詔惟德日親

永初中廣漢漢中羌反雷及巴郡有馬妙祈妻義王  
元憤妻姬趙蔓君妻華夙喪夫執共姜之節守一醮  
之禮號曰三貞遭亂兵迫匿懼見拘辱三人同時自  
沉于西漢水而沒死有黃鳥鳴其仁處徘徊焉國人  
傷之乃作詩曰關關黃鳥爰集于樹窈窕淑女是繡  
是黼惟彼繡黼其心匪石嗟爾臨川邈不可獲  
永建中秦山吳資元約為郡守屢獲豐年民歌之曰  
習習晨風動澍雨潤乎苗我后邳時務我民以優饒  
及資遷去民人思慕又曰望遠忽不見惆悵嘗依徊



恩澤實難忘悠悠心永懷

孝桓帝時河南李盛仲和為郡守貪財重賦國人刺之曰狗吠何誼誼有吏來在門披衣出門應府記欲得錢語窮乞請期吏怒反見允旋步顧家中家中無可與思往從鄰貸鄰人以言遺錢錢何難得令我獨憔悴

漢末政衰牧守自擅民人思治作詩曰混混濁沼魚習習激清流温温亂國民業業仰有脩其德操仁義文學政幹若洛下閎任文公馮鴻卿龐宣孟玄文和趙溫柔龔升侯楊文義等播名立事言行表世者

不勝次載者也

孝安帝元初三年梁州羌反入漢中殺太守董炳擾動巴中中郎將尹就討之不克益州諸郡皆起兵禦之三府舉廣漢王堂為巴郡太守撥亂致治進賢達士貢孝子嚴永隱士黃錯名儒陳髦俊士張璠皆至大位益州刺史張喬表其尤異徙右扶風民為立祠孝桓帝以并州刺史秦山但望字伯闔為巴郡太守勲卹民隱郡文學掾宓渠趙芬弘農馮允墊江龔榮王祈李温臨江嚴就胡良文愷安漢陳禧閬中黃閻江州毋成陽龔喬就張紹牟存平直等詣望自訟曰



郡境廣遠千里給吏無將人從冬徃夏還夏單冬複  
惟踰時之後懷怨曠之思其憂喪吉凶不得相見解  
緩補綻下至薪菜之物無不躬買於市富者財得自  
供貧者無以自久是以清儉天枉不聞加以水陸艱  
難山有猛禽思迫期會隕身江河投死虎口咨嗟之  
歎歷世所苦天之應感乃遭明府欲為更新童兒死  
婦懽喜相賀將去遠就近釋危蒙安縣無數十民無  
遠邇恩加未生澤及來世巍巍之功勒於金石乞以  
文書付計掾史人鬼同符必獲嘉報芬等幸甚望深  
納之郡戶曹史枳白望曰芬等前後百餘人歷政訟

訴未蒙感寤明府運機布政稽當皇極為民庶請命  
救患德合天地澤潤河海開闢以來今遇慈父經曰  
奕奕梁山惟禹甸之有倬其道韓侯受命比隆等盛  
於斯為美永興二年三月甲午望上疏曰謹按巴郡  
圖經境界南北四千東西五千周萬餘里屬縣十四  
鹽鐵五官各有丞史戶四十六萬四千七百八十口  
百八十七萬五千五百三十五遠縣去郡千二百至  
千五百里鄉亭去縣或三四百或及千里土界遐遠  
令尉不能窮詰姦凶時有賊發督郵追案十日乃到  
賊已遠逃蹤迹絕滅罪逮捕證驗文書詰訊即從春



至冬不能究訖繩憲未加或遇德令是以賊盜公行  
姦宄不絕榮等及隴西太守馮舍上谷太守陳弘說  
往者至有劫閭中令楊殷終津侯姜昊傷尉蘇鴻彭  
亭侯孫魯雍亭侯陳已殷侯樂普又有女服賊千有  
餘人布散千里不即發覺謀成乃誅其水陸覆害煞  
郡掾枳謝盛塞威張御魚復令尹尋主簿胡直若此  
非一給吏休謁往還數千閉囚須報或有彈劾動便  
歷年吏坐踰科恐失冬節侵疑先死如當移傳不能  
待報輒自刑戮或長吏忿怒冤枉弱民欲赴訴郡官  
每憚還往太守行桑農不到四縣刺史行部不到十

縣郡治江州時有温風遙縣客吏多有疾病地勢剛  
嶮皆重屋累居數有火害又不相容結舫水居五百  
餘家承三江之會夏水漲盛壞散顛溺死者無數而  
江州以東濱江山險其人半楚姿態敦重墊江以西  
土地平敞精敏輕疾上下殊俗情性不同敢欲分為  
二郡一治臨江一治安漢各有桑麻丹漆布帛漁池  
鹽鐵足相供給兩近京師榮等自欲義出財帛造立  
府寺不費縣官得百姓懽心孝武以來亦分吳蜀諸  
郡聖德廣被民物滋繁增置郡土釋民之勞誠聖主  
之盛業也雖貪大郡以自優暇不忍小民顛顛蔽隔



謹具以聞朝議未許遂不分郡分郡之議始於是矣  
哉

順桓之世板楯數反太守蜀郡趙溫恩信降服於是  
宕渠出九穗之禾胸忍有連理之木光和二年板楯  
復叛攻害三蜀漢中州郡連年苦之天子欲大軍出  
時征役疲弊問益州計曹考以方略益州計曹掾程  
包對曰板楯七姓以射白虎為業立功先漢本為義  
民復除徭役但出實錢口歲四十其人勇敢能戰昔  
羌數入漢中郡縣破壞不絕若線後得板楯來虜彌  
盡號為神兵羌人畏忌傳語種輩勿復南行後建寧

後漢作  
建和

二年羌復入漢牧守遑遑復賴板楯破之若

微板楯則蜀漢之民為左社矣前車騎將軍馮緄南  
征雖授丹楊精兵亦倚板楯近益州之亂朱龜以并  
涼勁卒討之無功太守李顥以板楯平之忠功如此  
本無惡心長吏鄉亭更賦至重僕役過於奴婢箠楚  
隆於囚虜至乃嫁妻賣子或自刳陳寃州郡牧守  
不理去闕庭遙遠不能自聞含怨呼天叩心窮谷愁  
於賦役困乎刑酷邑域相聚以致叛戾非有深謀至  
計僭號不軌但選明能牧守益其資穀安便賞募從  
其利隙自然安集不煩征伐也昔中郎將尹就伐羌



擾動益部百姓諺云虜來尚可尹將殺我就徵還後  
羌自破退如臣愚見權之遣軍不如任之州郡天子  
從之遣太守曹謙宣詔降赦一朝清戢

獻帝初平元年征東中郎將安漢趙穎建議分巴為  
二郡穎欲得巴舊名故白益州牧劉璋以墊江以上  
為巴郡江南龐羲為太守治安漢以江州至臨江為  
永寧郡胸忍至魚復為固陵郡巴遂分矣

建安六年魚復蹇胤白璋爭巴名璋乃改永寧為巴  
郡以固陵為巴東徙羲為巴西太守是為三巴於是  
涪陵謝本白璋求以丹興漢髮二縣為郡初以為巴

東屬國後遂為涪陵郡分後屬縣七戶二萬去洛三  
千七百八十五里東接胸忍西接蔣縣南接涪陵北  
接安漢德陽

巴子時雖都江州或治墊江或治平都後治閬中其  
先王陵墓多在枳其畜牧在沮今東突碛下畜沮是  
也又立市於龜亭北岸今新市里是也其郡東枳有  
明月碛廣德嶼故巴亦有三峽

巴楚數相攻伐故置扞關陽關及沔關

漢世郡治江州巴水北有柑橘官今北府城是也後  
乃遠南城劉先主初以江夏費瓘為太守領江州都



督後都護李巖更城大城周廻十六里欲穿城後山自汶江通水入巴江使城為州求以五都置巴州丞相諸葛亮不許亮將北征召巖漢中故穿山不逮然造蒼龍白虎門別郡縣倉皆有城巖子農代為都督農解後梓潼李福為都督

延熹中車騎將軍鄧艾為都督治陽關 十七年省平都樂城常安

咸熙元年但四縣以鎮西參軍隴西怡思和為太守二部守軍

江州縣郡治塗山有禹王祠及塗后祠北水有銘書

詞云漢初犍為張君為太守忽得仙道從此升渡今民曰張府君祠縣下有清水穴巴人以此水為粉則膏暉鮮芳貢粉京師因名粉水故世謂江州墮林粉也有荔芟園至熟二千石常設厨膳命士大夫共會樹下食之縣北有稻田出御米陂池出蒲葦藺席其冠族有波鈿母謝然愷楊白上官程常世有大官也枳縣郡東四百里治涪陵水會土地确瘠時多人士有章常連黎牟楊郡冠首也

臨江縣枳東西百里接胸忍有鹽官在監除二溪一郡所仰其豪門亦家有鹽井又巖甘文楊杜為大姓



晉初文立實作常伯納言左右楊宗符稱武隆人在  
吳為孫氏虎臣也

平都縣蜀延熙時省大姓殷呂蔡氏

墊江縣郡西北中水四百里有桑蠶牛馬漢時龍共榮  
以俊才為荊州刺史後有龔揚趙敏令德為巴郡太  
守淳于長寧雅有美貌黎夏杜皆大姓也

樂城縣在西州江三百里延熙十七年省常安縣亦  
省

巴東郡先主入益州改為江關都尉建安二十一年  
以胸忍魚復羊渠按晉志巴東郡有宕渠及宜都巫北井六縣

為固陵郡武陵康立為太守章武元年胸忍徐慮魚  
復蹇機以失巴名上表自訟先主聽復為巴東南郡  
輔斥為太守先主征吳於夷道還薨斯郡以尚書令  
李嚴為都督造設圍戍嚴還江州征西將軍汝南陳  
到為都督到卒官以征北大將軍南陽宗預為都督  
預還內領軍襄陽羅獻為代蜀平獻仍其任拜凌江  
將軍領武陵太守

泰始二年吳大將步闡唐咨攻獻獻保城咨西侵至  
胸忍故蜀尚書郎巴郡楊宗告急于洛未還獻出擊  
闡大破之闡咨退獻遷監軍假節安南將軍封西鄂



侯入朝加錫御蓋朝服吳武陵太守孫恢寇南浦安蠻護軍楊宗討之退走因表以宗為武陵太守住南浦誘卹武陵蠻夷得三縣初附民獻卒以捷為太守天水楊攸為監軍攸遷梁州刺史朝議以唐彬及宗為伐晉武帝問散騎常侍文立曰彬宗孰可用立對曰彬宗俱立事績在西不可失者然宗才誠佳有酒嗜彬亦其人性在財欲惟陛下裁之帝曰財欲可足酒嗜難改遂用彬為監軍加廣武將軍 迄吳平巴東後省羊渠置南浦

晉太康初將巫北并還建平但五縣去洛二千五百

里東接建平南接武陵西接巴郡北接房陵奴獯夷

蠻之蠻民

魚復縣郡治公孫述更名白帝章武二年改曰永安咸熙初復有橘官又有澤水神天旱鳴鼓於傍即雨也

朐忍縣西二百九十里水道有東陽下瞿數灘山有大小石城並靈壽木鹽井靈龜咸熙元年獻靈龜於

相府 大姓扶先徐氏漢時有扶徐荆州着石楚訪

有弱頭白虎復夷者也着石楚訪四字未詳○弱其

羈切又渠良切

文一重音三



漢豐縣建安二十一年置在郡西北彭溪源  
南浦縣郡南三百里晉初置主夷

郡與楚接人多勁勇少文學有將帥材

涪陵郡巴之南鄙從枳南入折丹涪水本與楚商於  
之地接秦將司馬錯由之取楚商於地為黔中郡也  
後恒有都尉守之舊屬縣五去洛五千一百七十里  
東接巴東南接武陵西接牂柯北接巴郡土地山險  
水灘人多鬪勇多獍蝥之民縣邑阿黨鬪訟必死無  
蠶桑少文學惟出茶丹漆蜜蠟漢時赤甲軍常取其  
民蜀丞相亮亦發其勁卒三千人為連弩士遂移家

漢中延熙十三年大姓徐巨反車騎將軍鄧芝討平  
之見玄猿緣其山芝性好弩手自射援中之猿子拔  
其箭卷木葉塞其創芝嘆曰嘻吾傷物之性其將死  
矣乃移其豪徐蘭謝范五千家於蜀為獵射官分羸  
弱配督將韓將名為助郡軍遂世掌部曲為大姓晉  
初移弩士于馮翊蓮勺其人性質直雖徙他所風俗  
不變故迄今有蜀漢關中涪陵其為軍在南方者猶  
存 山有大龜其甲可卜其緣可作义世號靈义出  
涪陵縣郡治

丹興蜀時省山出名丹



漢平縣延熙十三年置

萬寧縣孝靈帝時本名永寧

漢髮縣有鹽井諸縣北有獾蠻又有蟾夷也

巴西郡屬縣七去洛二千八百一十五里東接巴郡南接梓潼北接梁西城土地山原多平有牛馬桑蠶人自先漢以來僂偉倣儻冠冕三巴及郡分後叔布榮始周羣父子程公弘等或學兼三才或精秀竒逸其次馬盛衡承伯才藻清妙龔德緒兄弟英氣曄然黃公衡應權通變馬德信王子均勻孝興張伯岐建功立事劉二主之世稱美荆楚乃先漢以來馮車騎

范鎮南皆植斯鄉故曰巴有將蜀有相也及晉譙侯脩文於前陳君煥炳於後並遷雙固倬羣穎世甄在傳記縉紳之徒不勝次載焉

閬中縣郡治有彭池大澤名山靈臺見文緯書識大姓有三狐五馬蒲趙任黃嚴也

南克國縣和帝時置有鹽井大姓侯譙氏安漢縣號出人士大姓陳范閬趙

平州縣其二縣為郡

宕渠郡延熙中置以廣漢王士為太守郡建九年省永興元年李雄復置今遂為郡長老言宕渠蓋為故



寶國今有寶城廬城秦始皇時有長人二十五丈見  
宕渠秦史胡毋敬曰是後五百年外必有異人為大  
人者及雄之王祖世出自宕渠有識者皆以為應之  
先漢以來士女賢貞縣民車騎將軍馮緄大司農玄  
賀大鴻臚龐雄桂陽太守李温等皆建功立事有補  
於世緄温各葬所在常以三月二子之靈還鄉里水  
暴漲郡縣吏民莫不於水上祭之其列女節義在先  
賢志

宕渠縣郡治有鐵官石蜜山圖所採也  
漢昌縣和帝時置大姓勾氏

宣漢縣今省

右巴國分為五郡二十三縣

譔曰巴國遠世則黃炎之支封在周則宗姬之戚親  
故於春秋班侔秦楚示甸衛也若蔓子之忠烈范目  
之果毅風悖俗厚世挺名將斯乃江漢之含靈山岳  
之精爽乎觀其俗足以知其敦一矣昔沙麓崩卜偃  
言其後當有聖女興元城郭公謂王翁孺屬當其時  
故有政君李雄宕渠之廝伍略陽之黔首耳起自流  
隸君獲士民其長人之龜良有以也



華陽國志卷第一

華陽國志卷第二

漢中志

漢中郡本附庸國屬周赧王二年秦惠文王置郡因  
水名也漢有二源東源出武都氐道漾山因名漾禹  
貢流漾為漢是也西源出隴西嶓冢山會白水經葭  
萌入漢始源曰沔故曰漢沔在詩曰滔滔江漢南國  
之紀其應上昭于天又曰惟天有漢其分野與巴蜀  
同占其地東接南郡南接廣漢西接隴西陰平北接  
秦川厥壤沃美賦貢所出略侔三蜀六國時楚強盛  
略有其地後為秦恒成爭地漢高帝既克秦獲子嬰





項羽封高帝為漢王王巴蜀三十一縣帝不悅丞相  
蕭何謀曰雖王漢之惡不猶愈於死乎且語曰天漢  
其稱甚美夫能屈於一人之下則伸於萬乘之上者  
湯武是也願大王王漢中撫其民以致賢人收用巴  
蜀還定三秦天下可圖也帝從之都南鄭及項籍弑  
義帝高帝東伐蕭何常居守漢中足食足兵既定三  
秦蕭何鎮關中資其衆卒平天下以田叔為漢中守  
屬縣十一去洛一千九十一里叔既饋以軍饗又致  
名材立宮室帝嘉之後為魯相然以帝業所興不封  
藩王自叔之後世脩文教有倣儻之士異人竝挺鄧

公抗言於孝景之朝以明忠枉之情張騫特以蒙險  
遠為孝武帝開緣邊之地賓沙越之國致大宛之馬  
入南海之象而車渠瑪瑙珊瑚琳碧蔚寶明珠玳瑁  
虎魄水晶琉璃火浣之布蒲桃之酒筇竹藟醬殊方  
竒玩盈於市朝振揚威靈被於幽裔遂登九列杖節  
繡衣剖符博望谷口子真秉箕穎之操湛然岳立不  
營不求德聲邁流楊王孫應至人之概 自建武以  
後羣儒脩業開按圖緯漢之宰相當出坤鄉於是司  
徒李公屢登七政太傅子堅弈世論道其珪璋瑚璉  
之器則陳伯臺李季子申伯之徒文秀瑋曄其州牧



郡守冠蓋相繼於西州為盛蓋濟濟焉

莽時公孫述據蜀跨有漢中當秦隴之徑每懼其害安帝永初二年陰平武都羗反入漢中殺太守董炳没略吏民

四年羗復來太守鄭廩出屯褒中欲與羗戰主簿段崇陳禪以為但可堅守來虜乘勝其鋒不可當廩不從戰敗績崇與門下吏王宗原展及崇子勃兄子伯生力戰捍廩并命功曹程信素居守馳來赴難冒寇殞殮廩虜遂太盛天子乃拜巴郡陳禪為漢中太守虜素憚禪更來盤結禪知攻守未可卒下而年荒民

困乃矯詔赦之大小咸服既誅其亂首天子善之徙禪左馮翊太守程信怨恥乃結故吏冠蓋子弟嚴孽李容姜濟陳巳曹廉勾矩劉旌等二十五人誓志報羗各募壯士豫結同死以待寇太守鄧成命信為五官孽等門下官屬

元和二年羗復來巴郡板楯抹之信等將其士卒力奮討大破之信被八創二十五人戰死自是後羗不敢南向五年天子下詔褒歎信崇等賜其家穀各千斛宗展孽等家穀各五百斛列畫東觀每新太守到必先存問其家以羗畏服陳禪拜禪子澄漢中太



守

漢末沛國張陵學道於蜀鶴鳴山造作道書自稱太清玄元以惑百姓陵死子衡傳其業衡死子魯傳其業魯字公祺以鬼道見信於益州牧劉焉魯母有少容往來焉家初平中以魯為督義司馬住漢中斷谷道魯既至行寬惠以鬼道教立義舍置義米義肉其中行者取之量腹而已不得過過多云鬼病之其市肆價平亦然犯法者三原而後行刑學道未信者謂之鬼卒後乃為祭酒巴漢夷民多便之其供通限出五斗米故世謂之米道扶風蘇固為漢中太守魯

遣其黨張脩攻固城固人陳調素遊俠學兵法固以為門下掾說固守扞禦寇之術固不能用踰墻走投南鄭趙嵩嵩將俱逃賊盛固遣嵩求隱避處嵩未還固又令鈴下偵賊賊得鈴下遂得殺固嵩痛憤仗劍直入調亦聚其賓客百餘人攻脩戰死魯遂有漢中數害漢使焉上書言米賊斷道至劉焉子璋為牧時魯益驕恣璋怒

建安五年殺魯母弟魯率巴夷杜濩朴胡袁約等叛為讐敵魯時使使漢朝亦慢憍帝室以亂不能征就拜中郎將漢寧太守不置長吏皆以祭酒為治民璋



數遣龐羲李思等討之不能克而巴夷日叛乃以羲為巴西太守又遣楊懷高沛守關頭請劉先主討魯先主更襲取璋二十年魏武帝西征魯魯走巴中先主將迎之而魯功曹巴西閻圃說魯北降歸魏武贊以大事宜附託不然西結劉備以歸之魯勃然曰寧為曹公作奴不為劉備上客遂委質魏武武帝拜魯鎮南將軍封襄平侯又封其五子皆列侯時先主東下江安巴漢稽服魏武以巴夷王杜濩朴胡袁約為三巴太守留征西將軍夏侯淵及張郃益州刺史趙顥等守漢中遷其民於關隴二十四年春先

主進軍攻漢中至定軍淵郃顥來戰大為先主所破將軍黃忠斬淵顥首魏武帝復西征先主先主曰

孟德雖來無能為也我必有漢川矣先主遂為漢中

王將還成都當得重將以鎮漢中衆皆以必張飛張

飛心亦自許先主乃以牙門義陽魏延為鎮遠將軍

漢中太守先主大會羣臣問延曰今委卿以漢中卿

居之若何對曰若曹操舉天下而來請為大王拒之

若偏將十萬而來請為大王吞之衆壯其言初魏武

之留淵郃也以鷄肋示外外人莫察惟主簿楊脩知

之故曰夫鷄肋棄之如可惜食之無所得以比漢中



也 是後處蜀魏界固險重守自丞相大司馬大將軍皆鎮漢中 蜀平梁州治沔陽 大康中晉武帝子漢王廸受封更曰漢國郡但六縣

南鄭縣郡治周貞王十六年秦厲公城之有池水從旱山來入沔大姓李程趙氏

沔陽縣州治有鐵官又有度水水有二源一曰清檢二曰濁檢有魚穴清水出鯁濁水出鮒常以二月八月取蜀丞相諸葛亮墓定軍山

褒中縣孝昭帝元鳳六年置本都尉治也山名扶木有唐公房祠也

城固縣蜀時以沔陽為漢城城固為樂城蒲池縣

西鄉縣

魏興郡本漢中西城縣

哀平之世縣民錫光字長冲為交州刺史徙交趾太守王莽篡位拒郡不附莽方有事海內未以為意尋值所在兵遂起自守 更始即祚正其本官世祖嘉

其忠節徵拜為大將軍朝侯祭酒封鹽水侯

後漢中數寇亂縣土獨存漢季世別為郡

建安二十四年劉先主命宜都太守孟達從秭歸北伐房陵上庸自漢中又遣副軍中郎將劉封乘沔水



會達上庸以申耽弟儀為建信將軍西城太守達耽降魏

黃初二年文帝轉儀為魏興太守封鄖鄉侯蜀平遂治西城屬縣六戶萬去洛一千七百土地險隘其人半楚風俗略與荊州沔中郡同

西城縣郡治元康元年封越騎校尉蜀郡何攀為公國也

錫縣 安康縣 興晉縣晉置

鄖鄉縣本名長利縣縣有鄖鄉洵陽縣洵水所出

上庸郡故庸國楚與巴秦所共滅者也秦時屬蜀後屬漢中

漢末為上庸郡

建安二十四年孟達劉封征上庸上庸太守申耽稽服遣子弟及宗族詣成都先主拜耽征北將軍封鄖鄉侯仍郡如故

黃初中降魏魏文帝拜耽懷集將軍徙居南陽省上庸并新城子孟達誅後復為郡屬縣五戶七千去洛一千七百里

上庸縣郡治 比巫縣 安樂縣咸熙元年為公國



封劉後主也

武陵縣

安富縣

微陽縣

晉書上庸郡有  
上廡無安樂

新城郡本漢中房陵縣也秦始皇徙呂不韋舍人萬家於房陵以其隘地也漢時宗族大臣有罪亦多

徙此縣漢末以為房陵郡

建安二十四年孟達征房陵殺太守蒯祺進平三郡與劉封不和封奪達鼓吹關羽圍樊城求助於封達封達以新據山郡未可擾動為辭羽為吳所破殺達既忿封又懼先主見責遂拜書先主告叛降魏魏文帝善達姿才容觀以為散騎常侍建武將軍襲劉封

封敗走達據房陵文帝合三郡為新城以達為太守

後蜀丞相諸葛亮將北伐招達為外援故貽書曰嗟

乎孟子度邇者劉封侵凌足下以傷先帝待士之望

慨然永歎每存天下平素之志豈虛託名載策者哉

都護李嚴亦與書曰吾與孔明並受遺詔思得良伴

吳王孫權亦招之達遂背魏通吳蜀表請馬弩於文

帝撫軍司馬宣王以為不可許帝曰吾為天下主義

不先負人當使吳蜀知吾心乃多與之過其所求

明帝太和初達叛魏歸蜀時宣王屯宛知其情乃以

書喻之曰將軍昔棄劉備託身國家委將軍以疆場



之任任將軍以圖蜀之事可謂心貫白日蜀人愚智莫不切齒於將軍諸葛亮欲相破惟苦無路耳模之所言郭模亮遣詐降洩孟達謀者非小事也亮豈輕之而令宣露此殆易知耳達乃以書與亮曰宛去洛八百去此千二百里聞吾舉事當表上天子比相反覆一月間也則吾城已固諸軍足辦則吾所在深險司馬公必不自來諸將來吾無患矣及兵到達又告亮曰吾起事八日而兵至城下何其神速也亮以其數反覆亦不採遂為宣王所誅滅宣王分為三郡新城屬縣四戶二萬去洛一千六百里房陵縣有維山維水所

出東入瀘瀘字疑誤當作漢

○又按巴漢志新城郡有維水所出亦云東入瀘

沔鄉縣 昌魏縣 緩陽縣

右三郡漢中所分也在漢之東故蜀漢謂之東三郡蜀時為魏屬荊州晉元康六年始還梁州山水艱阻有黃金子午馬聰建鼓之阻又有作道九君搏土作人處而其記及漢中記不載又不為李雄所據璩識其大梗概未能詳其小委曲也

梓潼郡本廣漢屬縣也

建安十八年劉先主自葭萌南攻州牧劉璋留中郎將南郡霍峻守葭萌城張魯遣將楊帛誘峻求共城



守峻曰小人頭可得城不可得也帛退劉璋將向存  
扶禁由巴閬水攻峻歲餘不能克峻衆才八百人存  
衆萬計更為峻所破敗退走成都既定先主嘉峻功  
二十二年分廣漢置梓潼郡以峻為太守屬縣六戶  
萬去洛二千八百三十八里東接巴西西南接廣漢西  
接陰平北接漢中土地出金銀丹漆藥蜜也世有雋  
彥人侔於巴蜀

梓潼縣郡治有五婦山故蜀五丁士所拽地崩山處  
也有善板祠一曰惡子民歲上雷杼十枚歲盡不復  
見云雷取去四姓文景雍鄧者也

涪縣去成都三百五十里水通于巴為蜀東北之要  
蜀時大將軍鎮之有宕田平稻田孱水出孱山其源  
有金銀鑛洗取火融合之為金銀陽泉出石丹大司  
馬蔣琬葬此大姓楊杜李人士多見者舊也

晉壽縣本葭萌城劉氏更曰漢壽水通于巴西又入  
漢川有金銀鑛民今歲歲取洗之蜀亦大將軍鎮之  
漆藥蜜所出也大將軍費禕葬此山大姓葬此者多  
白水縣有關尉故州牧璋將楊懷高沛守也

廣漢縣 德陽縣 有劔閣道三十里至陰有閣尉  
桑下兵民也



武都郡本廣漢西部都尉治也

元鼎六年別為郡屬縣九戶萬去洛一千八百七十八里東接梓潼西接天水北接始平土地嶮阻有麻田氏僂多羗戎之民其人半秦多勇鬻出名馬牛羊漆蜜有瞿堆百頃嶮勢氏僂常依之為叛漢世數征討之分徙其羗遠至酒泉敦煌其攻戰壘戍處所亦多

建安二十四年先主遣將軍雷同吳蘭平之為魏將曹洪所破殺魏益州刺史天水楊阜治此郡阜以濱蜀境移其氏僂於汧雍及天水略陽

建興七年丞相諸葛亮遣護軍陳戒伐之遂平武都陰平二郡還屬益州

魏將夏侯淵張郃徐晃征伐常由此郡而蜀丞相亮及魏延姜維等多從此出秦川遂荒無晉民其氏僂楊濮屬魏魏遙置其郡屬蜀蜀平屬雍州

太康六年還梁州八年氏僂齊萬年反郡懼其寇晉民流徙入蜀及梁州永嘉初天水氏僂楊茂搜率種人為寇保據其郡貢獻長安愍帝以胡寇方盛欲懷來戎翟拜驃騎將軍

左賢王劉曜破長安丞相平昌公上隴據天水茂搜



數饋平昌公拜茂搜長子難敵征南將軍少子堅頭  
龍驤將軍種衆彊盛東破梁州南連李雄威服羗戎  
時平昌公為劉曜所破陳安作賊于時并氏僂如一  
國茂搜死敵堅代為主數歲 曜自攻武都敵堅南  
奔雄至晉壽遣子為質又厚賂雄兄晉壽守將稚曜  
不獲敵堅引還武都恃嶮驕慢攻走雄陰平太守羅  
演演稚舅也稚忿恚白兄含與雄求征之雄使含將  
稚數千人攻之時敵妻死葬於陰平含稚征至下辨  
入武街城以深入無繼盡為氏僂所破煞敵堅死子  
磐毅復代為主 按下辨縣  
名有赤亭

咸康四年敵從弟初煞磐毅兄弟代為主迄今 自  
茂搜父子之結據也通晉家及李雄劉曜石勒石虎  
張駿皆稱臣奉貢受其官號所向用其官及其年號  
下辨縣郡治一曰武街 武都縣東漢水所出有天

地澤

一本云  
大池澤

上祿故道縣

河池縣

泉街縣水入沮合漢也

沮縣河池水所出東狼谷也

上祿故道二縣  
名俱屬武都郡

平樂縣

脩城縣

嘉陵縣

陰平郡本廣漢北部都尉

永平後羗虜數反遂置為郡屬縣四戶萬去洛二千



三百四十四里東接漢中南接梓潼西接隴西北接  
酒泉土地山嶮人民剛勇多氏僂有黑白水羌紫羌  
胡虜風俗所出與武都略同

漢安帝永初二年羌反燒郡城郡人退住白水會漢  
陽諸羌反溢入漢殺太守漢陽杜琦自稱將軍叛亂  
廣漢郡屯葭萌漢使御史大夫唐喜討琦進討羌經  
年不下詔賜死更遣中郎將尹就討羌亦無功諸郡  
太守皆屯涪

元初五年巴郡板楯軍救漢中漢中大破羌羌乃退  
郡復治置助郡都尉 劉先主之入漢中也爭二郡

不得

建興七年諸葛亮始命陳戒平之 魏亦遙置其郡  
屬雍州自景谷有步道徑江由左儋行出涪鄧艾從  
之伐蜀

元康六年還蜀梁州

永嘉末太守王鑒粗暴郡民毛深左騰等逐出之相  
率降李雄晉民盡出蜀氏羌為楊茂搜所占

陰平縣郡治漢曰陰平道也

甸氏縣有白水出徼外入漢

平武縣有關尉自景谷有步道徑江由左儋出涪



艾伐蜀道也則主時置義守號關尉  
剛氏縣涪水所出有金銀鑛

右梁州

譔曰漢沔彪炳靈光上照在天鑒為雲漢於地畫為  
梁州而皇劉應之洪祚攸長蕭公之云不亦宜乎

華陽國志卷第二



